



乾象通鑑卷第十八

紫微垣星論

紫微垣總序

熒惑犯紫微垣

鎮星犯紫微垣

客星犯紫微垣

流星犯紫微垣

紫微垣總序

傳曰紫微垣一十五星流東西列環衛北極東蕃八星西蕃七  
星皆蕃衛之臣其東蕃近閭闔門第一星為左驂樞第二星  
為上宰第三星為少宰第四星為上弼第五星為火弼第六  
星為上衛第七星為火衛第八星為少丞其西蕃近閭闔門


歲星犯紫微垣

太白犯紫微垣

辰星犯紫微垣

慧孛犯紫微垣

雲氣犯紫微垣





第一星為右驂樞第二星為少尉第三星為正輔第四星為少輔第五星為上衛第六星為少衛第七星為上丞

陶隱居曰星垣皆欲明大小有常則內輔盛不明憂垣直則天子自將兵出征門開則兵起宮垣兩蕃正南開如門象者名曰閭闔門占有流星自門而出四野者當有中使啣命視其所往分野以論其事

天文志曰紫微垣在北斗一曰紫微大帝之坐也天子之常居也主命之度也一曰長垣一曰天營一曰旗星為蕃衛備蕃臣也宮闕兵起旌旗星直天子出自將宮中兵

一行游儀後論曰紫微垣星不欲直直則天子自出兵星欲均明而潤大小有常即吉星有怒角則內輔侵權垣開則衛兵暴起垣亡一星則有內變亡三星尤甚垣星俱亡則天下有

更王

陳卓敘占曰紫微垣星均明潤則吉星拆相去遠失故常及變色則天子禁兵起亦曰輔臣有憂

歲星犯紫微垣

天文別錄曰歲星入紫微垣天下有喜期百日有大赦

古今星釋曰歲星逆犯紫微垣人主失政亦曰革政

陳卓敘占曰歲星犯紫微垣上宰主將相有憂若死亡期一年海上通占曰歲星犯上火弼則輔臣擅命一曰臣下逆上令武密曰歲星逆犯守閭闔門期八十日有急兵若色白有芒角

大禍至

河圖遺書曰歲星逆犯紫微垣乘之久而不去去而復來乘之主人君有內憂



一行游儀後論曰歲星逆行失度入紫微垣國有奸佞誣君若成勾已則其國有大喪

大象旁通曰歲星失本色逆犯紫微垣天子有憂若色白出怒角則有篡殺之禍

夏氏微言曰歲星逆犯上弼則弼臣有謀亦曰人君有憂

張平子通例曰歲星入紫微垣色黃潤天子安靜人君悅豫期八十日有大赦若色青白黑及有芒角或光浮而數動搖者

天下有更王

武密曰歲星犯紫微垣其國有大喪

陳卓敘占曰歲星逆行失度犯守紫微則有兵喪

熒惑犯紫微垣

天文別錄曰熒惑逆犯紫微垣天子受制於強臣一曰有自立

侯王

甘德曰熒惑入紫微垣失本色及不循軌主臣弒君一曰有立

王

邾萌曰熒惑入紫微垣其色白無芒角主天下饑若色白入紫微

垣天下不安若退行不正天下起大獄若當而成勾已則天下革命一曰更紀

古今星釋曰熒惑犯紫微在閭闔中則王者不寧朝廷有憂

巫咸曰熒惑犯紫微閭闔右主大將死犯門主小將亡守門中久而不去或成勾已者天下不安

大象旁通曰熒惑留紫微垣中君子惡之若守西蕃第四第五

星主大臣坐法若守第八星臣下有陰謀

陳卓敘占曰熒惑犯紫微垣不由閭闔門及不循軌道又失本



色主天子有憂若犯守西蕃第二星主大臣受禍

一行游儀後論曰熒惑犯紫微垣留守久而不去及有怒角四出主大獄興陷忠良罪加無辜一日天下怨謗

陳卓敘占曰熒惑失行抵紫微垣主宮禁有兵兵起一日宮殿有火災

武密曰熒惑不循軌道入抵紫微犯中坐主人君失位天下大亂

晉懷帝永嘉三年正月庚子熒惑犯紫微垣占當有野死之王

又為水災宮殿是時太史令高堂冲奏乘輿宜遷幸不然無

洛陽五年六月劉曜王彌入京師焚燒宮殿執帝歸平陽從

此天下大亂

太白犯紫微垣

天文別錄曰太白入紫微垣中主大臣相戕賊王者有內憂

古今星釋曰太白犯紫微逆行失度而又失本色凌犯留守主

有大兵喪

陳卓敘占曰太白入紫微中則宮門當閉亦曰天子親甲冑邪

臣伏誅

石申曰太白入紫微西蕃大兵起四入天子廷若太白出紫微

垣宮中有兵變

荆州占曰太白逆入紫微主天子自將兵亦曰禁衛有兵變

武密曰太白不循軌道入留紫微垣有怒角四出主有內亂亦

曰宮中兵起若留中坐主有白衣會

一行游儀後論曰太白變色失度逆行紫微中近西蕃主大臣

受辱一曰輔臣坐獄



京房外傳曰太白經天逆入紫微留之久而不去去則竟天不  
有亡國必有死君一日天下更王

大象旁通曰太白從閭闔門入留守久之去則成勾己王者惡  
之一日有兵起亦曰有白衣會

河圖遺書曰太白逆犯紫微垣主天子宫闈有變又曰內有急  
兵

海上通占曰太白守紫微變色失行光芒乍東乍西光浮而數  
動搖主天子親戎服若近中坐殃尤甚

夏氏微言曰太白經天守紫微垣主國有大兵亦曰有白衣會  
鎮星犯紫微垣

天文別錄曰鎮星入紫微天子有德令一日天下有大赦期八  
十日內

古今星釋曰鎮星逆犯紫微則女主擅政若逆奄西蕃環統而  
守之所中者有憂若死亡遠期一年

石申曰鎮星守紫微其下國破亦曰大臣失職宗社將亡

陳卓敘占曰鎮星出紫微西南為德事出紫微東南為刑事若  
守之久及七十日以上者人君有憂又曰鎮星守西蕃蕃衛  
之臣有憂

大象旁通曰鎮星入紫微垣迫東蕃輔臣有匿謀又曰諸侯將  
叛則土入紫微西蕃

河圖遺書曰鎮星逆犯紫微東西蕃主大臣有奇禍若逆東蕃  
反抵西蕃主將相戕朝廷危國家受禍

海上通占曰鎮星逆行失度又失本色犯紫微垣主天子受制  
於強臣



辰星犯紫微垣

天文別錄曰辰星逆犯紫微垣天子當之一曰有內亂

陳卓敘占曰辰星入抵紫微垣主大臣相殺天下多怨謗

司馬彪曰辰星逆守紫微主後宮有憂一曰天下大水城邑為

水溺

武密曰辰星入紫微主後宮災或有大水若變色失常為兵喪

亦曰水災

古今星釋曰辰星逆犯紫微垣四出怒角主王者有憂若光浮

而數動搖主天子下殿亦曰大臣爭權

河圖遺書曰辰星守紫微東西蕃主大臣有憂若辰星失行則

大水入國門禾稼不熟人饑糴貴

一行游儀後論曰辰星逆犯紫微垣出四角乍東乍西乍南乍

北主大臣坐法亦曰人君有憂

京房外傳曰辰星明大有芒角其國遠期一年其野有死君若

光芒四出犯中坐一曰國祚將亡

石申曰辰星逆行失度守紫微西蕃大臣以失職被黜一曰輔

臣以死事坐法

客星犯紫微垣

荆州占曰國皇星入紫微垣兵起得地一曰客星入紫微垣國

有大變兵起一曰人主有憂若客星色赤入垣天下亂入其

中列大夫多罪者入其旁有亂臣

石申曰有星如拳正圓及如獸狀入紫微垣天子用璧賜諸侯

王

荆州占曰有客星色赤黑入紫微垣從其陽入有客兵期六十



日從其陰入有走王又曰有客星色黃入紫微垣人主益地  
天下有喜期十日

石申曰客星守犯紫微垣有不臣

荆州占曰客星犯紫微垣有大喪亦曰有白衣會

武密曰客星守紫微國易政

陳卓敘占曰客星犯東西左右驂樞人臣擅兵柄客星犯上少  
宰當易宰相期一年客星犯東西上少輔則權臣被黜亦曰  
宰相有憂客星犯東西上少衛則禁兵有急客星犯東西上  
少丞則羣臣有憂

河圖遺書曰客星犯紫宮大如枕及有怒角則有叛臣在天子  
側亦曰小人在位有異謀

張平子通例曰客星入紫宮色黃潤則旺者有喜慶事亦曰邊

陲益土地色青白而有怒角則有叛臣在君側色黑赤而有  
芒刃則輔臣有憂亦曰宰相有疾

一行游儀後論曰客星入紫微宮犯東垣上少宰則宰輔有憂  
執政者惡之犯東垣上少輔則近臣有陰謀犯西垣上少衛  
則禁兵大起客星直抵內坐星及守四輔色赤有芒角則有  
奸臣侍天子側亦曰天子無出宮

漢宣帝黃龍元年三月客星居王良西指紫微宮十二月宮車  
晏駕 漢元鳳四年九月客星在紫微宮中占曰為兵其五  
年發三輔群國少年詣北軍 漢孝章帝元和元年四月丁  
巳客星晨出東方在胃八度長三尺歷閣道入紫微宮留四  
十日滅占曰紫微宮者天子之宮也客星入留多日為大喪  
後四年帝崩 漢孝和帝永元十六年四月戊午客星出紫



微宮中行昴五月壬申滅客星從紫微宮行至昴為趙地至元興元年十月二日和帝崩殤帝即位一年又崩無嗣太后遣使迎清和孝王子即位是為孝安皇帝其應清河清地晉海西公太和四年二月客星見紫微宮西垣至七日乃滅占曰客星守紫微臣弑主六年桓溫廢帝為海西公

慧孛犯紫微垣

陳卓曰彗星入紫微有奇令

黃帝曰彗星出而抵紫微宮天下大亂

荊州占曰彗出紫微垣則天下易政

感精符曰星孛於紫宮將有陰謀叛者

武密曰彗孛干犯宮垣有異王立也

陳卓敘占曰慧出紫微垣犯東蕃星則有內變亦曰有陰謀逆

上彗星抵紫微西蕃星則百官有憂亦曰蕃衛臣有變謀

海上通占曰彗星光有芒及尋大直抵紫微垣則有自火諸侯

亦曰諸侯擅天子柄

張平子通例占曰彗星抵紫宮犯內坐星芒角炘若火焰則除

舊冥新之象亦曰天下有更王

河圖遺書曰彗星抵紫微芒角自西蕃炘出東蕃禁衛有變亦

曰有內亂

一行游儀後論曰彗星抵紫宮芒角犯內坐即天下易改亦曰

蕭牆有變

晉武帝大始五年九月丙戌星孛於紫宮占曰為兵喪紫宮天

子內宮十年武元楊皇后崩咸寧三年七月星孛于紫宮

占曰天下易王五年四月星孛於女御七月又孛於紫宮占



曰外臣陵主又紫微女御並為王者明年吳亡是其應也  
晉孝武太元十五年八月戊戌有星孛入紫微垣長十餘丈  
占曰王者當之二十一年帝崩 後周武帝建德三年四月  
丁巳有星孛來北紫微宮長七尺至十月丙辰上幸同州始  
州民王鞅擁衆反大將軍鄭恪討平之 唐中宗景龍二年  
八月有星孛於紫微宮占曰孛者非常之惡氣出于紫宮人  
君惡之至四年六月壬午帝遇毒崩於神龍殿

流星犯紫微垣

荊州占曰流星入紫微宮有兵喪水旱不調又曰使星入紫微  
宮匈奴兵起

陳卓敘曰流星入紫宮天下大亂若有奇令  
石申曰流星出紫宮天下之使也色青言憂色赤言兵色黃言

土功色白言義色黑言水事皆以所之野命其國

荊州占曰使星出紫微宮有空國徙王又曰奔星出紫微宮其  
國君出

武密曰流星自兩門而出入當有中使銜命視其所適分野審  
而論之不依門出入者外蕃國使也出則使出入則使入  
陳卓敘占曰流星自紫宮出從閭闔門天子遣使出視流星所  
之之野命其國若流星自外從門直抵內坐則有奸使入境  
亦曰王有左右有奸臣

河圖遺書曰客星從外抵觸紫宮則禁庭有憂若光芒炆若炬  
火及色變者王者惡之

漢昭帝元年流星入紫宮始出小入且大有光入有頭聲如雷  
三鳴而止占曰流星入紫宮天下大凶其四月癸未宮車晏



駕 孝章帝建初元年二月九日甲寅流星過禁宮中長數丈散為三滅占曰流星過入紫宮大人忌後四年癸丑明德皇后崩 唐武宗會昌六年二月辛丑夜中有流星赤色如桃光燭地有尾貫紫微垣入濁

雲氣犯紫微垣

荆州占曰有雲氣狀如雞雛出紫微宮此子孫之氣

石申曰赤氣出紫微宮兵大起

荆州占曰赤黃氣潤澤入紫微宮天子有劍氣出宮中天子用錢賜諸侯赤黃氣如帚出紫宮中天子用錢賜美女有黃白潤澤如劍氣入紫微宮天子有男喜狀如帚有婦女喜又曰黃白氣如桮椀正圓入紫微宮天子有璧玉 幸臣有獻女者若黃白氣出紫微宮中有立王

郝萌曰黃白氣如獸入紫微宮天子用畜賜諸侯又曰黃白氣如旗起紫微宮上人主有喜延年延壽

司馬彪曰白氣出紫微宮有喪亦曰有兵

武密曰赤黃氣連兩蕃天子有喜黑氣入紫微宮兩蕃國有暴

兵

陳卓敘占曰有黑雲氣環繞紫宮東西垣則天下有兵火若黑氣不入垣內則禍輕若黑氣直抵紫宮掩抱內坐者天子有

憂

海上通占曰有黃白雲氣繞紫宮從門入犯女御及女史柱史

星則天子以珠玉賜美人有青雲氣如人馬狀入紫宮則禁

兵暴起有赤雲氣如獸狀入紫宮則王者有喜

夏氏微言曰有黃氣如蓋在紫宮四輔及北極上盤覆繚繞不



散天子有大慶亦曰天子生有青白如疋物回環紫宮外則後宮進美女有黑氣如龍如虎直入紫宮不散仍閉中坐者則天下有自立諸侯亦曰天下改王

後漢建武三十年閏月甲午水在東井星白氣東南指炎長五尺為慧東北行至紫微宮西蕃止五日不見占曰白氣為喪有災作彗彗所以除舊真新紫宮天子之宮加其蕃除宮象後二年光武崩

乾象通鑑卷第十八終

乾象通鑑卷第十九

紫微垣內座星統論

北極星論

天皇大帝星論

五帝座星論

六甲星論

女史星論

尚書星論

陰德星論

北極星論

北極統占

慧孛犯北極

勾陳星論

四輔星論

天柱星論

女御星論

柱史星論

大理星論

客星犯北極

流星犯北極



雲氣犯北極

北極統占

傳曰北極五星在紫宮中北極北辰最尊者也其紐星天之樞也天運無窮三光迭曜而極星不移故曰居其所而衆星拱之第一星主月太子也第二星主日帝王也亦太一之坐謂最赤明者也第三星主五行第四星諸王也第五星庶子也黃帝曰極星盛人君吉昌不明則人君耗

孝經援神契曰德至於天則北極明

禮緯含文嘉曰天子心正則北辰齊列

荊州占曰北極中央不明則主不用事右星不明太子有憂左星不明庶子有憂

石申曰北極星明大數動搖主好出遊色青微者皆凶

春秋文耀鉤曰極星亡期八年中國無君主天下大亂

天文志曰賈逵張衡蔡邕王蕃陸績皆以北極紐星為樞是不動處也以儀準候不動處在紐星之末猶一度有餘

石申曰北極五星在紫微宮中一日天極一日北極一日北辰第一星為太子第二星為帝第三星為庶子第四第五星俱為後宮其占明文則吉慶變動則有憂

一行游儀後論曰自古星占論北極者多矣或以星次所主不同晉天文志曰以紐星為天極是不隨天運莫移者也祖暅以極星之末一度有餘為不動處是其異也石申以第三星主庶子星傳止主五行石申以第四第五星為後宮星傳以第四星為諸王第五星為庶子考其所主祖云雖不甚遠邈以古星變事驗推之石申之言理或然也如或不然荊州占



言左星不明則庶子有憂星傳分第四第五星為兩途諸王庶子後宮其名雖殊其實一也故以石申之言為當後之占象者不可不知

客星犯北極

石申曰客星犯北極客星見北極帝王暴驚宗室大亂王者脩郊祀親奉宗廟而大赦天下則災消又曰客星入北極天下道塞

荆州占曰客星入天樞人主有憂

黃帝曰客星出北辰天子出德令安天下若客星色赤守天樞天下兵盈野

郝萌曰有客星赤大出北極所之國大敗

黃帝曰客星干犯守北辰大人當之一曰有大喪一曰有叛者

荆州占曰客星干犯乘守太子星太子有罪犯乘守庶子星庶

子有罪若色又曰客星舍北極四夷乘若明王有喪又曰守

天樞兵聚一國有更君

武密曰客星出北極傍女主有謀又曰客星守北極天下憂國

易政

陳卓敘占曰客星出北極紐星則天子惡之若色赤有芒角則

天下更王

河圖遺書曰客星乘守北極太子星太子星謂北極第一星也赤黃有怒角則太子惡之亦君嗣不昌

彗星犯北極

荆州占曰彗入樞星名人起兵相誅天下大亂

武密曰彗守干犯北極天下有大喪



荆州占曰彗刺天樞五精之類謀

天文別錄曰彗星本近北辰芒角怒炆垣外長可尋丈者王有內變亦曰宮中有謀君者

陳卓敘占曰慧星出北辰奄太子有憂若庶子則庶子惡之芒角奄第四第五星則後宮有憂

河圖遺書曰星孛北辰紐星則王者惡之亦曰國有大兵喪海上通占曰彗星出紫宮尾貫北辰則天下有立王亦曰有自立諸侯

夏氏微言曰彗出北極紐星則君不用道臣下僭位有篡奪之象

古今星釋曰北極天子之常居慧星貫北極則天子有憂亦曰有白衣會

後漢建安十一年正月星孛於北斗首在斗中尾貫北辰占曰

彗掃北辰人主易位其後魏文帝受禪

流星犯北極

焦延壽曰流星入北極兵大起

黃帝曰流星出入北辰地動

荆州占曰流星入北辰主使有兵在外罷

武密曰流星入紫微宮外國有使貢珍玉者流星抵北極星過者國易政流星出北極有使出大者大使小使觸蕃屏不依門而出入外國之使各隨方而命東西北地

陳卓敘占曰流星過北辰出紫微則天子遣使受命出疆若流星自外入紫宮貫北辰則外國有使至色白言兵色青言貸糧色黃言貢珠玉色黑有奸使色赤言喪亦曰言兵亂主憂



河圖遺書曰流星抵北辰則光芒有聲如風雨狀者後宮有叛  
謀亦曰庶子有憂

天文別錄曰流星抵觸北辰光芒奄紐星移時不見者天子有  
憂亦曰人君失道流星觸北辰紐星

古今星釋曰流星光奄北辰則使不達自內出者不達四方自  
外入者不達中國因其內外而言之

雲氣犯北極

荆州占曰蒼白氣入天樞中兵起又曰黃白氣入天樞中天下  
兵起天子賜諸侯王黑氣入天樞中大人憂赤氣近極出紫  
宮宮中兵起黃白氣類走獸飛鳥入紫宮連極星神氣有喜  
黃白氣入紫微宮連入極星宮有自立諸侯黑氣抵太極坐  
左右諸臣死

海上通占曰青雲氣入紫微宮繞天樞上盤覆不散者天子憂

國用有黃白氣乘北辰則天子自將兵有黑氣奄北極則天  
下五穀不登水傷禾稼亦曰有急兵

勾陳星論

勾陳星統占

彗孛犯勾陳星

雲氣犯勾陳星

勾陳星統占

傳曰勾陳六星在五帝上大帝之正妃也

樂緯執圖微曰勾陳星主後宮

巫咸曰勾陳主天子護軍

荆州占曰勾陳星天子大司馬也

客星犯勾陳星  
流星犯勾陳星



陶隱居曰勾陳星主天子六軍將軍又主三公三師也

郗萌曰勾陳星盛天子之輔強小微則輔弱

荆州占曰主不用諫佞人在位則勾陳星不明

郗萌曰勾陳星不見女主惡之

傳曰勾陳星在五帝南將軍之象明吉暗凶

石申占曰勾陳六星在五帝坐南將軍之象其占明潤則吉星

暗則凶

陳卓敘占曰勾陳為大帝之象坐後宮嬪御之象亦主大帝之

正妃星明潤則吉星暗則後宮有憂一星不明則皇后失勢

亡三星則女主惡之六星俱亡則有女喪

客星犯勾陳

石申曰客星蒼白色入勾陳大司馬有喪出勾陳軍破將有憂

若客星色赤大勾陳兵亂大司馬戮死出勾陳大戰有功若

客星黃白色入勾陳中天子立大司馬出勾陳將有不戰兵

在外罷又曰客星入勾陳大司馬溺軍中則無咎

武密曰客星守勾陳後宮有使欲謀若客星黃色出勾陳東傍

有進美女者後宮有喜

陳卓敘占曰客星守勾陳則後宮有新進美女亦曰後宮有新

寵嬪御

古今星釋曰客星乘勾陳不去及五十日色白有芒角者後宮

有妬色黑則有女喪

夏氏微言曰客星大如杯守勾陳則大將受命出師芒角乍東

乍西者野有死將亦曰女主惡之

河圖遺書曰客星入勾陳六星中乘之六十日不出者有賤妾



入後宮亦曰有倡俳

彗孛犯勾陳

武密曰彗孛干犯勾陳後宮有謀者一云近臣有憂又曰彗孛

干犯勾陳傍后妃有謀

陳卓敘占曰彗孛干犯勾陳則廢后亦曰女主惡之

古今星釋曰慧星犯勾陳中則大將受戮亦曰野有死將

天文別錄曰星孛勾陳中後宮有妬忌亦曰後宮有匿又曰有

非命美人

河圖遺書曰星孛勾陳光奄六星移時不見則皇后惡之亦曰

后妃失寵

流星犯勾陳

荆州占曰流星入勾陳必有迫劫主者

武密曰流星貫勾陳后妃有黜者流星出勾陳後宮有憂

河圖遺書曰流星入紫宮抵觸勾陳則臣下凌上亦曰有迫主

叛謀事若流星自勾陳中紫宮則後宮有異謀亦曰后妃惡

之

陳卓敘占曰流星自外入紫宮抵觸勾陳者後宮爭寵匿謀亦

曰女主竊君柄

雲氣犯勾陳

荆州占曰蒼白氣入勾陳中大司馬憂出勾陳軍破將憂若赤

氣入勾陳中大司馬戮死出勾陳中戰將有功若黃氣入勾

陳中天子立大司馬出勾陳不戰兵在外者罷若黑氣入勾

陳中大司馬溺軍中則無咎

武密曰青氣入勾陳大司馬憂亦曰將軍惡之



陳卓敘占曰赤氣入勾陳中侵天皇大帝坐則有內變亦曰人君惡之

天皇大帝星論

天皇大帝星統占

客星干犯天皇大帝星

彗孛干犯天皇大帝星

流星干犯天皇大帝星

雲氣干犯天皇大帝星

天皇大帝星統占

傳曰天皇大帝一星在勾陳口中其神曰耀魄寶主御羣靈執

萬神圖抱極樞

春秋元命苞曰帝位明達翮秀良則星光大色度和同天下太

平國號未央

甘德曰天皇大帝一星在勾陳口中其神曰耀魄寶占曰星不

明則吉星明大則凶

一行游儀後論曰天皇大帝星得常則隱而不顯失常則出而

有光其占主天子位得常則吉失則天子有憂甘德所謂不

見則吉見則凶是也

古今星釋曰天皇大帝星本無占法遇見則為變明大則為失

常所以候者候其見也故本無占法

客星干犯天皇大帝

武密曰客星干犯天皇大帝坐除舊布新之義國易政若客星

守天皇大帝宮中有謀

古今星釋曰客星守天皇大帝星則國有更王亦曰不有亡國

必有死君

海上通占曰客星乘天皇大帝星七十日不出去則天子有憂



又曰凡候天皇大帝星但候勾陳口中星視其有無以為準  
若客星守勾陳口中是犯守天皇大帝星客星交犯所主宜  
如何處故辨異論曰自外由漸而犯守為守勾陳自內忽見  
乘守者是犯天皇大帝星也

彗孛干犯天皇大帝

武密曰彗孛干犯天皇大帝坐大臣謀叛以家坐罪

陳卓敘占曰彗孛出天皇大帝坐芒角炆外者則輔臣謀逆  
不成亦曰有匿謀謀之者敗

古今星釋曰彗孛本在外怒角抵天皇大帝坐則天子無出宮  
內有匿謀亦曰人君失位

河圖遺書曰星孛天皇大帝坐則王者有憂亦曰天子有疾  
夏氏微言曰星孛天皇大帝坐天子不安社稷傾覆

流星干犯天皇大帝

武密曰流星干犯天皇大帝坐國有憂

陳卓敘占曰流星自外抵天皇大帝坐則神器有憂亦曰神器  
失守

海上通占曰流星自內坐出抵它星則王不安其位亦曰有內  
奸使

古今星釋曰流星干犯天皇大帝坐芒角炸若炬火則王者受  
辱諸侯不受制亦曰諸侯自立

雲氣干犯天皇大帝

武密曰雲氣入紫宮犯奄帝坐潤澤吉黃白氣入紫宮連大帝  
座臣有獻美女者出天皇大帝上者有立王

陳卓敘占曰蒼白氣若足練竟天奄天皇大帝座者則天下有



憂變有黃氣在帝座側不散天子有喜慶亦曰邊陲益地有赤氣如人狀侍帝座側外國有進美女者

### 四輔星論

四輔星統占

客星干犯四輔星

彗孛干犯四輔星

流星干犯四輔星

雲氣干犯四輔星

### 四輔星統占

傳曰四輔四星所以輔佐北極而出度授政也

陶隱居曰四輔抱北辰樞主君臣禮政萬機也

甘德曰四輔為輔臣之位協贊萬機

邾萌曰四輔星去君臣失禮輔臣有立者

武密曰四輔星光浮而動則凶占曰其小明則吉君臣同暗則

不理大則凶臣逼君

河圖遺書曰四輔四星乃象天子之輔臣也星不欲大明大明

有芒角則臣逼君星欲小明而黃潤尊卑列而辨上下序而

理一星有芒角則輔臣擅主權四星俱大明而有怒角則輔

臣竊賞罰有震主之威

陳卓敘占曰四輔繫抱北極為贊協天子出度授政也

臣下有離心離德星失常而就聚則輔臣有合謀逼主一星

亡則輔臣受刑二星亡則宰相有憂三星亡則大臣失勢四

星俱亡則大臣受誅以家坐罪

### 客星干犯四輔

武密曰客星干犯四輔主三公大臣憂一日宰相死

巫咸曰近臣有憂則客星犯四輔



陳卓敘占曰客星抵觸四輔則三公宰相惡之亦曰有被黜宰相

夏氏微言曰客星乘守四輔大如杯留之不去六十日則輔臣有憂若星色赤黃則有受辱大臣色蒼白則有兵死輔臣色黑則宰相死極刑

彗孛干犯四輔

武密曰彗孛干犯四輔權臣有戮者貴相當之

石申曰彗星犯四輔則法令臣主者一曰人主惡之謂四輔抱北極者也彗犯四輔光及北極所以人主惡之

陳卓敘占曰彗本在四輔則光芒炆外則貴臣受戮亦曰幸臣有憂

古今星釋曰四輔者抱北辰之星也彗星干犯四輔而光及北

辰則天子有憂人臣易位亦曰輔臣有以罪坐者

流星干犯四輔

武密曰流星入抵四輔宰相黜不然有憂流星出四輔宰相出使橫貫屏蕃外國之使也

河圖遺書曰流星入抵四輔奄星不見者繫獄若流星自四輔中出貫東西蕃垣則宰相受命出疆光芒四散者使不達四方

海上通占曰流星入觸四輔則輔臣死亦曰輔臣當之若光芒色如練則宰相被黜

雲氣干犯四輔

武密曰黃白氣入四輔相有憂出四輔宰相病失位不然則死陳卓敘占曰黃氣繚繞四輔而不奄文而不散者宰相進秩亦



曰天子賜宰相爵祿

古今星釋曰青赤氣如獸狀入四輔中則輔弼之臣爭權黑氣貫四輔則輔臣死

五帝座星論

五帝座星統占

彗孛干犯五帝座星

客星干犯五帝座星  
流星干犯五帝座星

雲氣干犯五帝座星

五帝座星統占

傳曰五帝座五星在華蓋下覆大帝也色正吉若變色則為災石申曰五帝內座在扛下華蓋東其占明正吉變動為災此斧

度之具以備宸樞

星傳曰坐在勾陳之北華蓋扛之東明潤則吉變動為災

海上通占曰五帝座五星一星不明則天子下殿五星俱亡則

有更王星不欲敬側王者惡之

天文別錄曰五帝座為天子居處燕息之所貴明潤不喜敬側占色依常則天子有德以福天下色變星暗則天子不安社

稷傾覆

客星干犯五帝座

却萌曰客星犯五帝座有臣犯主

武密曰客星犯五帝座大臣受誅又曰易政

陳卓敘占曰客星乘五帝坐則下臣逆上令不行亦曰臣不受制於天子

古今星釋曰客星守帝座則臣下逼主亦曰有匿謀

河圖遺書曰客星自外直抵五帝座則天子有外憂亦曰君側



有奸佞

慧孛干犯五帝座

武密曰慧孛干犯五帝座人民饑宮廟徙治大臣憂期三年又

曰兵起宮中

海上通占曰慧出五帝座則有除舊革新之象亦曰王者當之

河圖遺書曰孛星出五帝座則奸佞臣在側賢人退位不得進

人主失權

流星干犯五帝座

武密曰流星干犯五帝座兵起大臣謀叛又曰主移宮室若流

星出五帝幸臣自殺不則有誅戮

陳卓敘占曰流星直抵五帝座則幸臣大勢亦曰大臣有憂

河圖遺書曰流星出五帝座則天子離宮亦曰王者惡之流星

抵觸五帝座星俱不見則有更王亦曰有白衣會

雲氣干犯五帝座

武密曰黃氣入五帝座者不出六十日太子即位赤黃色出五

帝坐人君有喜當立宗廟

海上通占曰有黑雲氣奄五帝坐宗廟有憂亦曰社稷有變

陳卓敘占曰有蒼白氣奄閉五帝坐禁衛有兵變

天柱星論

天柱星統占

彗孛干犯天柱星

雲氣干犯天柱星

天柱星統占

客星干犯天柱星

流星干犯天柱星

傳曰天柱五星在東垣下主建政教懸法國門內常以朔望日



懸禁命於天柱以示百官

甘德曰天柱五星在紫微垣中近東北隅主宗廟大臣周禮以正歲之月懸圖法之象魏此之謂也

星讚曰天柱立正朔望書也星明則天下安書同文車同軌四海治平下民康悅

古今星釋曰天柱星明正教行星不明則禮樂不興刑罰不中海上通占曰天柱一星不明則政令不施三星不明則下民不從今五星俱亡則刑罰不中天下無法度

河圖遺書曰政教失則天柱圯禮樂興則天柱明

客星干犯天柱

武密曰客星干犯天柱國中有賊客星守天柱主移宮室天子大臣有憂之象

陳卓敘占曰客星犯天柱則宮闕有驚虞亦曰人臣憂主

夏氏微言曰客星乘天柱則有奸臣害政教

慧孛干犯天柱

武密曰慧孛干犯天柱臣叛主王者惡之

黃帝曰慧孛干犯天柱天子易宮亦曰天子下殿古今星釋曰慧出天柱則人君失教令臣下不奉君政

陳卓敘占曰星孛天柱則人君失其道天下大亂

流星干犯天柱

武密曰流星抵天柱宗廟不安亦曰宗社有虞

巫咸曰流星抵天柱人君有憂

古今星釋曰流星抵天柱奄星不見則人主有憂亦曰人君惡之



石申曰流星抵天柱三公當之  
古今星釋曰流星抵天柱星不滅則大臣或三公當之澁害淺也

陳卓敘占曰流星抵犯天柱則臣下有犯上政令不奉王法亦曰禮樂征伐不自天子出

雲氣干犯天柱

武密曰赤黃氣入天柱天子喜對陵廟之事

石申曰黃赤氣出天柱三公薨一云將相死

古今通例曰有黑氣繞天柱王者政令不施於下亦上下之情不通天下有冤獄

六甲星論

六甲星統占

客星干犯六甲星

慧孛干犯六甲星

流星干犯六甲星

雲氣干犯六甲星

六甲星統占

傳曰六甲六星在華蓋扛傍主分陰陽化時節候出入故在扛傍所以布政教而授農時也

武密曰六甲星明則陰陽和不明則寒暑易節星亡則水旱不時

河圖遺書曰六甲六星在華蓋扛之西臨紫微垣西蕃近帝坐旁主分陰陽寒暑正四時節令也人君視此以布時政因此以授民事星明潤則陰陽和寒暑節星暗則有愆陽有伏陰萬物不由其道也

天文別錄曰六甲一星不明則寒暑失序



一行游儀後論曰六甲星不明則六子之功虧一星亡則一氣失時六星俱亡則六氣不備四時失序

客星干犯六甲星

武密曰客星色赤守六甲主旱若客星色黑守六甲主水災星色白守六甲人多疾疫

夏氏微言曰客星色青黃守六甲星則大臣不能燮理陰陽愆忒若水若旱天下民饑

河圖遺書曰客星犯六甲色黃潤則天下糴賤五穀豐

一行游儀後論曰客星守六甲色黑則太史受誅術士犯上

彗星干犯六甲

武密曰彗孛干犯六甲女主出政令又曰君惑圖史

荊州占曰彗星入六甲則日月蝕

古今星釋曰彗孛干犯六甲則政教失國易政上下之情不通

亦曰人臣竊主權

海上通占曰彗星本在六甲星中芒角炸出侵帝座則大臣有

叛謀陰陽倒置節候失序天下大亂

流星干犯六甲

武密曰流星干犯抵六甲術士謀

巫咸曰流星貫六甲廢太史令或水滂不節也一曰流星犯六

甲農廢寒暑相及一曰大旱

陳卓敘占曰流星抵六甲太史令竊干時政鼓惑衆心

一行游儀後論曰流星貫六甲則正朔異四夷陰陽失序天下

災疫

雲氣干犯六甲



武密曰黃雲入六甲術士興蒼白雲繞入六甲太史官受爵賜  
祿

陳卓敘占曰黃白氣入六甲則太史令得君青白氣出六甲則  
術士有奸謀黑氣貫六甲星或明或沒則天下惑邪道

女御星論

女御星統占

客星干犯女御星

彗孛干犯女御星

流星干犯女御星

雲氣干犯女御星

女御星統占

傳曰女御四星在大帝北女御宮八十一御妻之象也

武密曰女御星明多有內寵者不明則無

陳卓敘占曰女御星明大則後宮多內寵四星就聚則後宮爭

寵一星亡則嬪御失勢四星俱亡則後宮尊卑失序多怨謗

一行游儀後論曰女御在勾陳南為嬪御之象不欲明明則內

寵甚多暗則後宮失序黃潤而小明乃其常也得常則後宮

有序子孫衆多遇變則後宮有憂

客星干犯女御

武密曰客星干犯女御後宮有欲謀者一曰有自戮 又曰客

星守女御後宮有廢者不然有女客入宮者謀

陳卓敘占曰客星色黃入守女御星則外國有進美女者若色

赤黃而有芒角則天子寵及賤妾色青黑而有怒角則有倡

俳入宮

彗孛干犯女御

武密曰彗孛干犯女御後宮當有誅戮者又曰彗孛出女御後



欲謀其君者

陳卓敘占曰彗星出女御星則嬪御有犯法者亦曰後宮有匿

謀

河圖遺書曰星孛女御星中則後宮有兵起亦曰有兵喪

晉武帝咸寧五年七月有星孛女御占曰大人當明年吳亡

流星干犯女御

武容曰流星抵女御後宮有黜者又曰流星抵女御後宮有賞  
賜邊將者流星入女御外國有進美女者流星出女御後宮  
有廢者

古今星釋曰流星出女御後宮有失寵美人亦曰後宮有憂

陳卓敘占曰流星入女御則有新寵美人亦曰有新進美人

雲氣干犯女御

武容曰黃白氣入女御後宮有寵者亦曰有子喜赤黃氣入女

御后妃有受賜蒼白氣入女御後宮多病

陳卓敘占曰有黃氣入女御中女主受爵祿亦曰后生太子

河圖遺書曰有青白氣入女御中及凌奄不散則後宮有憂

女史星論

女史星統占

客星干犯女史星

彗孛干犯女史星

流星干犯女史星

雲氣干犯女史星

女史星統占

傳曰女史一星在柱史北主婦人之微者主傳漏故漢有侍史

陶隱居曰女史主記禁傳漏動靜明暗之事

一行游儀後論曰女史一星在柱史北掌人君功過星明潤則



史直星暗則史多諂諛亦曰婦人之官掌宮中之事明則吉  
星暗及色變則凶

客星干犯女史星

陳卓敘占曰客星干犯女史星則宮中有匿謀亦曰後宮有狂  
巫惑衆

一行游儀後論曰客星色赤犯女史星則後宮有犯法嬪御亦  
曰有美人狂惑作妖言

彗孛干犯女史星

陳卓敘占曰彗孛本干犯女史則後宮有犯法美人亦曰宮中  
有異謀

河圖遺書曰星孛女史中則宮嬪失序亦曰女主有憂

流星干犯女史星

天文別錄曰流星干犯女史星則有外至美女作妖言惑衆情

亦曰有新寵美女干政

一行游儀後論曰流星干犯女史星則後宮傳漏失時奸邪入  
內亦曰奸邪鼓惑宮女

雲氣干犯女史星

天文別錄曰有黃雲入女史星則後宮有新寵美女亦曰女主  
侵國政又曰后妃生子若黑氣入女史則後宮有失寵美女

亦曰女主惡之

柱史星論

柱史星統占

客星干犯柱史星

彗孛干犯柱史星

流星干犯柱史星

雲氣干犯柱史星



柱史星統占

傳曰柱史一星在北辰東星讚曰柱史記過密移東厨古者有史記事此之象也厨書藏也

武密曰其星明為史直詞不明反是也

陳卓敘占曰柱史星明則言路不塞上下情達天下無怨言庶人不議星暗及變色則邪佞在位諂諛媚天子

海上通占曰柱史星明大而有怒角則諫臣徇私情亦曰圖書有火災

客星干犯柱史星

武密曰客星干犯柱史有受賜金玉者客星守柱史史有默者陳卓敘占曰客星干犯柱史星色黃則有諫官受錫予亦曰言官直色青白有怒角則諂諛者在位

彗孛干犯柱史星

武密占曰彗孛干犯柱史星太子憂又曰彗星出柱史百官多默退御史有刑法

海上通占曰彗孛干犯柱史星御史被默亦曰言路塞諫官受誅

河圖遺書曰彗孛干犯柱史星芒角炸若火炬則天子誅言官流星干犯柱史

陳卓敘占曰流星干犯柱史星則左右史有讒言色黃則史直色白則史佞色青則多諂諛色黑赤而有怒角則言路不通民多怨謗

雲氣干犯柱史

武密曰黃氣入柱史人君賜其爵祿予左右史



石申曰蒼白氣入柱史左右史死黃白氣入柱史史官遷  
武密曰黃氣入柱史君自示其咎若雜以白氣君有過史官不  
敢言

尚書星論

尚書星統占

客星干犯尚書星

彗孛干犯尚書星

流星干犯尚書星

雲氣干犯尚書星

尚書星統占

傳曰尚書五星在垣東西南維主納言夙夜諮謀 作納言此  
之象也

武密曰動靜與四輔不殊

古今星釋曰尚書星主協贊萬機輔弼人君之象也星明大則

臣下竊主柄主小明則吉星有芒角則逼君

陳卓敘占曰尚書星光浮而動則凶星小明而黃潤則君臣同  
一星有芒角則臣下不受制於君五星俱有芒角則大臣有  
叛謀

客星干犯尚書星

武密曰客星干犯尚書星左右僕射死不然則有黜

古今星釋曰客星干犯尚書大如杯留之不去及五十日輔臣  
有憂色青色則大臣受辱亦曰有被黜宰相

彗孛干犯尚書星

武密占曰彗孛干犯尚書八坐官大謀叛不然太子有憂

陳卓曰彗星干犯尚書尚書有事坐罪者

海上通占曰彗孛干犯尚書則權臣有受戮者亦曰貴相惡之



古今星釋曰彗本出尚書中光芒指內坐則天子有憂亦有內變

流星干犯尚書星

武密曰流星抵尚書人君不納忠諫黜退又曰流星入尚書八坐有憂不然出官又曰流星出尚書出使

古今星釋曰流星抵尚書星貴臣出使橫貫蕃屏外國有使來河圖遺書曰流星入抵尚書星奄五星俱滅則弼臣受戮

雲氣干犯尚書星

武密曰黃雲氣入尚書八坐官皆受賜黑氣入尚書有掌刑法尚書坐罪期百八十日赤雲入尚書有出鎮者

陳卓敘占曰黑氣入尚書星則大臣有叛謀亦曰弼臣不受制於人君

大理星論

大理星統占

客星干犯大理星

彗孛干犯大理星

流星干犯大理星

雲氣干犯大理星

大理星統占

傳曰大理二星在宮門左主平刑斷獄也 陶隱居曰大理星

主刑獄之事星不欲明明則天下有冤枉 武密曰大理星明則刑有冤酷亦曰天下起大獄 古今星釋曰大理星坼有光芒動搖者則枉法及良善亦曰罪加無辜 陳卓敘占曰大理星明則天下興大獄星就聚則有貴人受殃亦曰貴人受刑星小明而黃潤不動搖則天下獄訟平刑罰中 客星干犯大理星



武容曰客星干犯大理有貴人下獄色黃過赦色白受戮色赤黃無罪客星守大理有刑獄寃滯者不然則刑獄之官有黜者 古今星釋曰客星干犯大理星則有大臣受寃獄亦曰貴臣受刑 陳卓敘占曰客星色黃干犯大理則刑獄官受賞亦曰刑罰措而不用

彗孛干犯大理星

武容曰彗孛干犯大理大臣以家事下獄坐罪者期八十日遠百二十日若彗孛出大理刑獄之官有憂 陳卓敘占曰彗孛干犯大理則貴人犯法彗本出大理光芒炘地星以所當星命之假令光衝尚書星則輔臣受刑光滅柱史則史官繫獄以此命其所當星

流星干犯大理星

武容曰流星干犯抵大理刑獄之官憂流星出大理刑獄之官出使一曰流星抵大理決獄不非法官有黜 河圖遺書曰流星干犯大理星執法者憂若流星抵觸大理不見則刑獄濫及無辜執法者非其人

雲氣干犯大理星

武容曰黃白氣入大理刑獄之官受遷 巫咸曰黃白氣入大理有大赦異氣入大理決獄不平刑法官受黜 陳卓敘占曰青氣入大理則刑罰不中蒼白氣出大理刑法官憂

陰德星論

陰德星統占

客星干犯陰德星

彗孛干犯陰德星

流星干犯陰德星

雲氣干犯陰德星



陰德星統占

傳曰陰德二星在尚書西主周給賑恤 陶隱居曰陰德主天下紀綱陰德遺惠周給恤之事 焦延壽曰陰德星明太子立或有女主治天下者 宋均曰陰德星常微命著明者也 赤運圖曰陰德滅聖人絕禮 天文別錄曰陰德星不欲明大小明而黃潤則吉芒角則紀綱不振東乍西而動搖不定者天下有饑民 河圖遺書曰陰德星圻則天下怨謗不能賑給百姓亦曰天下有離心 陳卓敘占曰陰德星就聚則有女主干政一星亡則紀綱法度廢而不舉兩星俱亡則國祚亡亦曰彙祀

客星干犯陰德星

武密曰客星守陰德大發賑給又曰大旱民饑流者半 陳卓

敘占曰客星干犯陰德星則國用匱乏糴貴百姓饑 河圖遺書曰客星抵觸陰德星則天下旱荒民有菜色亦曰五穀不登

彗孛干犯陰德星

武密曰彗孛干犯陰德太子有逆謀又曰彗星出陰德後宮與太子有連謀 古今星釋曰彗孛干犯陰德星則宮中有異謀亦曰太子干政 河圖遺書曰彗星干犯陰德星則後宮有叛謀一曰女主與太子連謀 流星干犯陰德星

武密曰流星抵陰德人君賞罰政令不行又曰流星入陰德弼臣有主錢穀者黜之 陳卓敘占曰流星抵陰德則人君惠德不施恩澤不及下民民多怨嗟若流星出陰德則錢穀匱




竭國用之 古今星釋曰流星奄陰德星不見則太子有憂  
亦曰後宮有逆謀

雲氣干犯陰德星

武密曰黃氣入陰德天子有喜一曰諸侯受賜黑青氣出陰德  
太子有憂 陳卓敘占曰黃氣入陰德國用豐富天子錫予  
諸侯 河圖遺書曰黑氣入陰德則後宮有變亦曰太子有  
憂

乾象通鑑卷第十九終





2